

赤水玄珠第二十九卷目錄

外科小引

五發癰疽論

背疽其源有五

疔瘡

雜瘡

癰

瘡科總論

華佗癰疽疔瘡論

五發癰疽通方

反花瘡

婦人陰瘡

臙瘡

疔瘡

背脊其氣不通

卷之五

赤水玄珠第二十九卷

新安生生子孫一奎著

外科門小引

生生子曰外科最重者莫如癰疽最急者莫如喉
風疔腫患之者生死立見其餘瘡癤皆可緩圖
非若上三証急若風火也究其受病之源經曰
營氣不從逆于肉理乃生癰腫又曰膏粱之變
足生大疔又曰六府不從留結為癰又曰諸痛
痒瘡瘍皆屬心火大抵皆氣血虛弱蘊鬱熱毒

調養失宜之可致也予區非專門外科蓋常咨
訪推究頗知治法大躰茲採前人所論癰疽証
治載列卷首疔瘡腫瘍次之陶節庵癰疽經薛
一立齋外科精要二書實外科權輿業是者不可
不使之隨囊檢視能熟此二書鮮有敗事予固
特舉歷試有功者揭出以告同志云

瘡科總論

夫癰疽瘡瘍者皆由氣血不和喜怒不時飲食不
節寒暑不調使五臟六腑之氣拂鬱于內以致陰

陽乖錯氣血凝滯而發也亦有久服丹石燥熱之藥熱毒結深而為癰疽也夫癰疽之疾多生於膏粱富貴之人以其平昔所食肥膩炙燂安坐不勞嗜慾無節以致虛邪熱毒內攻煎熬氣血而成也癰者壅也大而高起屬乎陽其脉浮數疽者沮也平而內發屬乎陰其脉沉數瘡者總名也癰者有頭小瘡也經云諸痛痒瘡皆屬心火蓋心主血而行氣若氣血凝滯挾心火之熱而生癰疽之類也然所感有淺深故所發有輕重大小之不同也六

府積熱騰出於外肌肉之間其發暴甚皮腫光軟
侵袤廣大者癰也五臟風毒積熱攻注於肌骨其
發猛惡初生一頭如痞癰白色焦枯觸之而痛應
心者疽也熱發於皮膚之間浮腫根小不過二三
寸者癰也夫癰發於六府若燎原之火外潰肌肉
疽生於五臟沉澁難療若陶室之燧內消骨髓癰
則易療惟難將息而遲瘥疽則難療而易痊夫諸
瘡之中惟背疽疔瘡最為急症其次莫如腦疽腸
癰喉癰之類亦其急者也至若癰癰懸癰痔漏諸

瘡之類其証可緩而治也又有疥癬癰瘡風疔之類雖云俱屬瘡類而其輕重緩急自有不同也夫癰疽之疾要須察其是虛是實是冷是熱或重或輕對証用藥無失先後次序凡人年四十以上頭項鬚頤背脊腰脅或筋骨之上所視不見之處稍有瘡癰便不可輕易待之若視之怠慢以為常疾每見至微至著喪命者多矣便宜速急治之庶幾得救譬之救火初起則易救至于燎原之勢不可撲滅矣其理亦由是也凡瘡未破毒攻臟腑一毫

熱藥斷不可用此是先後次第之妙訣也夫瘡有五善七惡不可不辨若動息自寧飲食知味一善也便利調勻二善也膿潰腫消色鮮不臭三善也神彩精明語聲清亮四善也身氣和平五善也如煩躁時嗽腹痛渴甚泄利無度小便如淋一惡也膿血大泄焮痛尤甚臭惡難近二惡也喘粗短氣恍惚嗜卧三惡也未潰先黑久陷面青唇黯便汚者四惡也肩項不便四肢沉重五惡也不能下食服藥而嘔食不知味六惡也

聲嘶色脫唇鼻青黑

面目四肢浮腫七惡也更有氣噫痞塞欬逆身冷
自汗無時目瞪耳聾恍惚驚悸語言頻錯皆惡証
也五善見三則差七惡見四必危若五善并至則
吉而安七惡全見必危而死矣已上所論大綱其
諸証候治法列論于後

五發癰疽論

夫五發癰疽者謂發背發腦發鬚發眉發頤是也
人之一身血氣周流而無間稍有壅聚莫不隨所
至而發焉又豈特五者哉夫發背者乃五臟風熱

六府邪毒灌于筋骨之間發于經絡之內榮衛虛損氣血衰殘所致也其發初如粟米大最不可輕忽後必大發也若初起紅腫高起者後必不為害故曰外形如粟中可容谷外貌如錢裏可著拳如惡毒深滿膿血交粘用藥可痊若膿臭穢無絲此血敗氣衰陽絕陰盛必難療理治初起或陰塌不起便可用艾多灸或隔蒜灸之如痛灸至痒如痒灸至痛此最妙法也若疽瘡已成亦可用火針烙開瘡口則易治也若瘡高起者不可用針烙

疽則難治癰疽形症已具前總論中茲不復論至
如發腦發眉發鬚發頤地位不同然皆由內
臟伏陽結滯邪毒上壅隨其經絡地分而發也其
諸發癰初起皆宜宣散熱毒要須看人元氣虛實
而治之庶不悞矣若元氣實者亦可用大黃之劑
泄去毒氣或用漏芦五香連翹之類皆可用內托
十宣之類補之亦有陰瘡寒塌不起雖云用灸然
亦不可服寒涼之劑亦宜以煖藥溫之全在活法
不可執一也其敷貼洗藥具方于下隨症用焉

外科精要曰癰疽既灸即服藥以護腑臟如護心散凡有疽疾早進數服使毒氣外出而無嘔吐之患否則咽喉口舌生瘡或黑爛如菌若瘡發四五日之後宜間用別藥治之

又曰護心散乃解金石發疽之藥若發熱炊腫作渴飲冷而嘔者宜之若發熱炊腫作渴飲湯而嘔者不宜用之蓋脾虛停痰或寒邪內侵或痛傷脾胃宜用六君子湯若喉舌生瘡或口乾作渴或小便頻數宜用六味丸大凡諸瘡作嘔若飲冷便秘

是熱毒也黃連消毒散解之飲冷便和是胃火也
竹葉石膏湯清之懶食飲湯是胃虛也補中益氣
湯補之大便不實喜飲熱湯是脾胃虛寒也六君
子加炮姜以溫之常見脾胃虛弱者用護心散反
致胃寒嘔惡其喉舌生瘡乃腎水枯涸虛火炎上
其証甚惡急用加減八味丸多有得生者

又曰癰疽嘔逆是毒氣沖心非脾胃之冷當服內
托散楊氏云鼻衄初愈不曾表汗毒在經絡則背
大疽自肩下連腰脇腫硬如石其色紫黑以涼藥

投之終夜大嘔連進托裏散嘔止瘡潰赤水淋漓
四十日而愈又有患瘰者痛過輒嘔服托裏即止
今有疽病不服此藥者故引楊氏之言以解世人
之惑

華佗癰疽瘡腫論

夫癰疽瘡腫之作皆五臟六腑蓄毒不流非獨因
榮衛壅塞而發也其行也有處其止也有歸假令
發於喉舌者心之毒發於皮毛者肺之毒發於肌
肉者脾之毒發於骨髓者腎之毒發於下者阴中

之毒發於上者陽中之毒發於外者六府之毒發
於內者五臟之毒故內曰潰外曰潰上曰從下曰
逆發於上者得之速發於下者得之緩感於六府
則易治感於五臟則難瘳又近骨者多冷近膚者
多熱近骨者久不愈則化成血蟲近膚者久不愈
則傳氣成漏成虫則多痒少痛或先痒後痛成漏
則多痛少痒或不痛不痒內虛外實者多痛少痒
血不止則多死潰膿則多生或嘔逆無度飲食無
時皆癰疽使然症候多端要當詳治

詳立齋曰瘡瘍生虫乃肝經風熱其成漏乃元氣
虛弱其出血乃脾虛有火其潰膿乃元氣充實至
於嘔逆等証屬脾胃虧損所致當調補元氣庶保
無虞

背疽其源有五

一天行二瘦弱氣滯三怒氣四腎氣虛五飲冷酒
食炙博服丹藥

治癰疽用藥大綱

一初患癰疽便服內托散以免後來口舌生瘡仍

用騎竹馬或隔蒜灸

一服五香連翹湯如大便踈快即止仍量人虛實

一癰疽潰後宜服排膿內補散若嘔逆木香湯下

一癰疽初作便宜灼艾及麥飯石膏塗四圍中留

口出毒如瘡小通傳之既潰用神異膏帖之

一癰疽已潰日用猪蹄湯淋洗將愈之際三日一

次

一癰疽將斂宜用神異膏如毒未盡不可遽用生

肌之劑